

四庫全書

史部

欽定四庫全書

平定準噶爾方略正編卷三十二

乾隆二十一年秋閏九月丙午

諭定邊右副將軍兆惠等派兵駐劄伊犁事宜

兆惠等奏言臣等籌辦伊犁屯種事宜明春先
令回人一百名綠旗兵一百名指定地方耕種
已奉

諭旨准行俟收穫後再添派綠旗兵廣為墾種約可

派兵一千名至防守地方應派索倫巴爾虎兵
一千名吉林兵五百名察哈爾兵三百名滿洲
兵二百名共計二千名此項兵丁即將綠旗兵
耕種所獲及各部回人輸納貢賦給為糧餉既
省內地運送之煩而於防守地方實有裨益奏
入

上諭軍機大臣曰兆惠等籌辦屯種事宜及派各處
兵丁駐劄伊犁俱屬妥協第念索倫兵丁連歲在

軍營行走未便多留前降旨令伊等於大兵撤回
時由北路回至游牧今未知已抵何處即著兆惠
咨詢達爾黨阿等索倫兵丁如尚未過額爾齊斯
著揀選三百名前往伊犁俟明年另行派出更替
再哈寧阿已帶領滿洲兵前往合計伊犁已有兵
丁若干俟兆惠查明奏到再由吉林察哈爾等兵
丁內揀選派往

定邊右副將軍兆惠等疏奏密飭副都統阿敏

道辦理回部事宜

兆惠等奏言據遣往回城副都統阿敏道報稱
現在領兵已抵綽魯克特赫地方侯宰桑錫克
錫爾格調遣各鄂拓克兵丁到時即行前進並
稱中途接從前遣往回城侍衛托倫泰報文知
托倫泰上年已招降喀什噶爾回人正與葉爾
羌回人交戰遇阿逆遣往人員將伊等擒獲後
經波羅泥都收留今年五月內霍集占到彼即

將阿逆使人殺戮派人護送托倫泰前來惟將
副將軍薩喇爾之兄特古斯及同往之人厄魯
特等俱留在彼處據霍集占等告稱厄魯特等
人不可信是以不令回至軍營俟奉到

諭旨遵行再厄魯特霍爾博斯宰桑衛徵哈什哈率
領屬人六百戶現在逃入回城等語臣等即密
飭阿敏道現在托倫泰已回據其所報回城地
方並無事故毋庸多帶兵丁前往即令同錫克

錫爾格赴彼詳察情形如無抗違之意即將回人等加意安撫並約束帶往之厄魯特等毋得任其肆行擾害所有回人應輸貢賦查明數目令其交納其應赴伊犁種地回人務於本年十月內攜帶牛具前赴所指地方並令回人頭目親身前赴伊犁以備詢問奏入

上諭軍機大臣曰兆惠等密飭阿敏道前赴回城辦理事宜甚屬妥協即照所奏辦理托倫泰著即令

其來京至衛徵哈什哈帶領屬人逃入回城係從
前同古爾班和卓逃竄者此時如入回城毋庸查
究俟收服回人後曉諭伊等擒獻首惡所有屬人
即行賞給回人為奴如或藏匿別處兆惠等應留
心防範並即派兵勦滅毋使滋生事端方為妥協
戊申

命瑪瑪承襲和通額默根公爵博爾和津承襲諾爾
布敦多卜貝勒

上諭軍機大臣曰雅爾哈善等奏公和通額默根在
軍前身故伊子瑪瑪帶領三百五十餘戶現在輝
特汗巴雅爾附近薩爾海地方居住等語和通額
默根公爵著伊子瑪瑪承襲並准其在薩爾海居
住貝勒諾爾木敦多卜既無子嗣著加恩令伊姪
博爾和津承襲貝勒博爾和津尚在幼齡其游牧
事務暫交伊族人摩羅及宰桑新登等經理沙克
都爾曼濟係該部盟長並著留心照看

己酉

命加臺站叅領第魯巴三品職銜

上諭軍機大臣曰第魯巴遣往西路軍營協理臺站
事務著賞給三品職銜並銀一百兩即速馳驛前
往

庚戌

命授內閣學士阿桂叅贊大臣

上諭軍機大臣曰成衮扎布奏稱阿桂自到軍營後

辦理諸務甚屬盡心等語阿桂著授為叅贊大臣
同將軍成袞扎布擒勦逆賊務宜加意奮勉以副
委任

命鄂哲特等補授默得齊各宰桑

上諭軍機大臣曰據兆惠等揀選應行補授默得齊
宰桑等各員請旨默得齊宰桑員缺著鄂哲特補
授伊克烏魯特宰桑員缺著錫克錫爾格調補卓
托魯克宰桑員缺著圖布慎補授伊克巴爾達穆

特宰桑員缺著巴朗補授哈丹宰桑員缺著莽鼐
調補

壬子

命派二十一昂吉人等管理臺站

上諭軍機大臣曰據兆惠等奏噶爾藏多爾濟等屬
人現在生計未能充裕等語噶爾藏多爾濟及扎
那噶爾布等屬人不必派令管理臺站著將二十
一昂吉人內派出坐臺人等帶領戶口與北路喀

喇沁一例辦理則二十一昂吉人等得藉錢糧養
贍而噶爾藏多爾濟等不得以承辦臺務藉口著
兆惠等即遵照辦理惟臺站須派大員管轄今扎
哈沁所設臺站即令宰桑鄂爾奇木濟管理甚屬
妥協餘亦著派附近臺站各宰桑等查辦以專責
成

癸丑

命授親王桑寨多爾濟為圖謝圖汗副將軍

上諭軍機大臣曰圖謝圖汗雅木丕勒多爾濟年老
殘疾不能辦事其副將軍員缺著桑寨多爾濟補
授桑寨多爾濟現在成衮扎布軍營著即回至部
落會同派往之瑚圖靈阿多爾濟等查拏搶奪商
人匪賊務宜妥協辦理毋得姑息

丙辰

申諭西北兩路將軍等撤兵

定西將軍達爾黨阿等奏言領兵前進之衆贊

大臣阿里衮策布登扎布等回至軍營臣等公
同商議阿布賚現為大兵擊敗逃竄今兩路大
兵已抵哈薩克極邊之境又屢經攻戰馬匹疲
乏時值隆冬巴里坤解送之馬匹牲隻糧麵等
項尚未送到現在咨催臣等揆度現在駐兵之
處四面曠野冬月不能屯駐擬即領兵前往阿
布賚游牧之哈薩拉克等處過冬使阿布賚等
失其巢穴俟明年春草萌生其如何進兵征勦

之處另行詳議具奏奏入

上諭軍機大臣曰達爾黨阿等奏請在哈薩拉克過冬明歲整兵前進一摺伊等辦理一切俱未合宜朕早已料及是以八月內即降旨令其撤兵著即遵照前旨辦理即如伊等派阿里衮領兵前進而將軍等並未同行策楞係獲罪効力之人亦不知奮身前往阿里衮僅率七十餘人遇賊千餘獲其馬匹輜重甚多設伊等俱能如此奮勇逆賊早已

就擒又遣往哈薩克之楚魯克昭華什等曾否回
至軍營奏內並未聲明種種辦理未見端緒殊負
委任之意哈達哈前遇阿布賚並未窮追甚屬畏
蕙所賞雙眼翎不准戴用撤兵回時著隨同成衮
扎布辦事俟拏獲青滾雜卜後再降諭旨從前降
旨令撤回兵丁俱由北路行走第恐接濟口糧稍
覺周章現在兆惠又有請留兵駐劄安濟哈雅之
奏著達爾黨阿哈達哈等於所領兵丁內派出一

千名交哈寧阿帶往安濟哈雅駐劄其餘兵丁俱
由北路撤回阿里衮富德著先行馳驛來京鄂實
明瑞額爾登額亦著來京再哈達哈策布登扎布
等撤兵回時路過烏梁海地方並著協同舒赫德
擒拏郭勒卓輝等正法唐喀祿已令在科布多駐
劄同阿蘭泰辦理事務舒明亦著馳驛來京至哈
薩克錫喇尼瑪吞圖布等連年効力軍營殊屬勞
勩著即傳諭伊等帶領所屬兵丁各回游牧以示

體卹

丁巳

宣諭中外撤兵事宜

上諭大學士曰逆賊阿睦爾撒納辜恩背叛一事正
準噶爾甫定之後若留此遺孽恐其煽惑新附之
衆是以嚴飭策楞玉保等帶兵追緝不意二人各
懷私見坐失事機其意以為追之不及可以自謝
其罪及之而不獲則罪滋大此其居心尚可問耶

及朕飭催再四西北兩路之兵咸會始克稍振軍
聲達爾黨阿哈達哈等遂有哈薩拉克山伊什勒
等處之捷阿布賚汗巴巴等望風奔潰阿逆易服
潛逃然所獲之楚魯克等兩次縱回傳諭擒獻卒
以限期相誑逾月之久阿布賚遂得乘間移帳遠
徙此又不免以遲徊觀望為其所愚夫自去年平
定伊犁遂竄逆賊以至連敗哈薩克皆賴

祖宗威靈

上天默佑以成大功而朕所用大臣往往以慎重觀望
坐失事機是朕之咎也今又豈肯遂非使師旅勞
憊於絕域且馬力已疲而賊蹤益遠非此諸臣姑
且遷延所能了事是以於八月望前即特降諭旨
令其班師乃達爾黨阿等於未經奉到此旨之先
已奏請暫回哈薩拉克地方過冬俟明春再進此
不過強為之詞耳事斷難行仍諭令遵旨撤回雖
逆賊暫逃顯戮揆此情勢阿逆窮蹙奔竄之不暇

必不能因我撤兵復勾連阿布賚等犯我降番諸
部倘竟奮螳螂之臂則伊犁現在料理規模已定
兵整糧足厄魯特諸部落傾心向化聽我指揮與
去歲情形迥異逆賊到即成擒此萬無可慮者總
之前年辦理準夷原非大舉而機不可失斷自朕
心乃數月之間平定伊犁繫執酋長完我

兩朝未竟之緒此實仰荷

上天眷佑朕不敢自以為功至諸臣之不能奮然為國

家出力顧此失彼朕雖未嘗不早慮及而每以途
遠失之事後用是慙憤至阿逆中途叛去原於西
師全局毫無輕重特已將次就擒而復致颺脫未
克即正典刑然揆之天理人情從來叛賊穴鼠釜
魚斷無久延之理如羅卜藏丹津自雍正年間叛
入準噶爾越歲二紀去年仍搜捕得之獻俘闕下
此亦近事之明徵大驗也況以阿逆之滅倫犯紀
如猘犬噬人衆咸切齒其能久逃天網耶其親屬

悉早經擒縛而率先助逆之阿巴噶斯哈丹克什木等俱次第解至京師咸已伏法阿逆遠處窮荒俟一二年後朕再為相機酌理此時將雖無功而兵勞堪念是用息我師徒所有用兵前後本末宣諭中外俾共知之

諭派兵駐劄伊犁事宜

上諭軍機大臣曰前兆惠奏派各處兵丁二千名為駐劄防守之用已降旨令於撤回大兵內或留索

倫兵三百名並令哈寧阿帶兵一千名駐劄安濟
哈雅今思安濟哈雅地方現已無事且路途較遠
糧運稍艱不若將此項兵丁駐劄伊犁著傳諭兆
惠查明伊犁現在兵丁若干約共駐兵一千五百
名即足敷防守之用不必照伊原奏辦理

戊午

諭定邊右副將軍兆惠詳籌伊犁屯種事宜

上諭軍機大臣曰回人伯克噶岱默特之子阿卜都

爾滿來京詢知各處回人情形著即遣回游牧並
著密諭兆惠回人與厄魯特等素如仇敵若令回
人屯種伊犁或受厄魯特等欺凌轉恐滋事不若
仍令回人各歸原處令其輸納貢賦似較妥協伊
犁等處可種之地既多酌量遣派內地兵民前往
屯種照安西地方之例辦理既可支給屯兵糧餉
而於鎮守地方更屬有益著兆惠詳悉妥議辦理
諭定邊左副將軍成衮扎布等籌辦駐兵防守事宜

上諭軍機大臣曰西北兩路大兵已經撤回成衮扎布等擒拏青滾雜卜自可計日就獲惟阿逆尚未就擒自烏里雅蘇台軍營以至科布多納米爾沙扎海各處應如何駐兵防守及轉運糧餉各事宜俱須豫為籌辦哈達哈等所帶索倫兵丁等効力多年應否存留俱著傳諭成衮扎布會同哈達哈等悉心詳議辦理

命叅贊大臣舒明仍留軍營領兵協擒青滾雜卜

上諭軍機大臣曰昨降旨命舒明來京今據成衮扎布奏請派科卜多兵二百名交舒明前往協擒青滾雜卜著即帶領前往科卜多駐劄兵丁尚多並著再派三百名令侍衛巴寧阿藍翎侍衛勤泰等會同舒明前進

定邊左副將軍成衮扎布疏奏安插博克達沙畢納爾人衆事宜

成衮扎布奏言博克達沙畢納爾人等一千二

百餘名原議移駐青海因道里遼遠暫行安插
察罕托輝地方蒙

恩賞給口糧兩月明年尚應籌辦口糧牲隻方可遷
移若將此項沙畢納爾人等交與哲卜尊丹巴
胡土克圖匝雅班第達胡土克圖額爾德尼班
第達胡土克圖等管轄則伊等皆得其所且免
遠遷青海之費奏入報

聞

己未

諭定邊右副將軍兆惠派兵防禦哈薩克事宜

上諭軍機大臣曰兆惠等奏稱向哈薩克進兵一帶
臺站地方間有嗎哈沁搶奪馬匹派散秩大臣賽
齋喇呼等帶兵搜拏並知會達爾黨阿於撤兵回
程時沿途查緝等語辦理甚屬妥協達爾黨阿等
進兵時若能於臺站地方沿途派兵搜查則嗎哈
沁等必不敢肆行搶奪此即伊等辦理未到之處

此時大兵已撤阿布賚等必仍歸其巢穴雖經大兵擊敗自不能更生事端或阿逆從中慫恿騷擾附近之厄魯特等亦未可定著傳諭兆惠飭知各鄂拓克等選兵數百名前往襲擊使賊不得寧處自無暇復出滋事倘遇阿逆在彼即奮力擒拏此際兵已全撤出其不意更易成功兆惠等即遵照辦理厄魯特頭目巴圖爾帶領臺站人等截殺賊衆甚屬奮勇著加恩賞給藍翎并銀三十兩以示

鼓勵

命賞給駐劄伊犁官兵銀兩

上諭軍機大臣曰健銳營索倫察哈爾厄魯特駐劄伊犁兵丁効力行間深堪軫念著兆惠動用正項錢糧酌量賞賜以示體卹前降旨令圖什墨勒扎爾呼齊宰桑等輪班駐劄伊犁辦事亦應給與官項圖什墨勒著按月給銀三十兩扎爾呼齊給銀二十兩閒散宰桑給銀十兩得木齊收楞額等各

給銀五兩伊等自必益加奮勉兆惠等可即遵照辦理

辛酉

申諭派兵駐劄伊犁事宜

上諭軍機大臣曰據達爾黨阿奏稱接到撤兵諭旨即帶領兵丁二千五百名前赴北路協擒青滾雜卜其餘兵丁三千名俱令回至西路交與兆惠差遣等語所奏非是伊犁無須多留兵丁駐劄前已

降旨兆惠令其酌留兵丁一千五百名多亦不必
踰二千仍著兆惠遵旨於此項撤回兵丁內酌量
留駐其餘俱行撤回

甲子

訓飭定西將軍達爾黨阿

上諭軍機大臣曰前因達爾黨阿哈達哈等効力軍
前尚知奮勉加恩賞給雙眼翎以示鼓勵乃西北
兩路大兵會合一處反彼此推諉各存意見殊

委任朕念伊等遠行勞苦不即重治其罪然亦無
功可錄達爾黨阿所賞雙眼翎亦著同哈達哈一
併繳還不准戴用

諭定邊右副將軍兆惠等密飭各部落防範阿逆事
宜

上諭軍機大臣曰今大兵已撤阿逆奸詭百出或潛
行唆誘各厄魯特等皆未可定著兆惠密飭噶爾
藏多爾濟巴雅爾等並著巴蘭泰傳諭都爾伯特

輝特各王公台吉等留心防範如阿逆遣人煽誘
立即擒獻毋隨賊計

命獎賞內大臣扎木禪察達克等

上諭軍機大臣曰隨同哈達哈等進兵之內大臣扎
木禪察達克等經年効力軍營深堪軫念著各賞
銀一百兩即令伊等回至游牧以示體卹倘逆賊
青滾雜卜逃竄至彼並著伊等加意偵探速行擒
獻

冬十月丙寅

命釋俘獲哈薩克人等回巢

上諭軍機大臣曰西北兩路大兵現在撤回已傳諭
兆惠酌量派兵往襲阿布賚使賊不得寧處並通
飭各鄂拓克防範哈薩克所有此次進兵俘獲哈
薩克人等原無得罪天朝之處應酌量施恩釋放
回巢俾伊等衆哈薩克咸知感戴自將阿逆擒獻
現有旨傳諭阿布賚擇伊等明白曉事者齎往仍

加恩酌給口糧其頭目人等並著賞賜緞疋兆惠
接到此旨即轉諭哈薩克錫喇尼瑪等遵照辦理
如已將哈薩克人等分給衆鄂拓克即無庸復行
查回惟將烏圖卜妻子釋放再據玉保順德訥奏
哈薩克察罕拜巴圖爾等久有歸誠之意著兆惠
詢問哈薩克錫喇尼瑪等如察罕拜巴圖爾係哈
薩克緊要之人有意投誠即著於此次釋放人內
令其到彼傳諭兆惠等務宜妥協辦理

命傳

諭哈薩克阿布賚汗巴巴等

上諭哈薩克阿布賚汗巴巴曰逆賊阿睦爾撒納背
恩叛逆上干天討朕命將軍大臣等領兵追擒逆
賊窮蹙奔竄入爾哈薩克境內大兵臨爾部落特
為追擒逆賊一人於爾部原屬無涉前已遣使傳
旨曉諭意爾等接奉諭旨必能明曉大義擒獻逆
賊豈意爾等墮賊術中反奮螳臂迎敵大兵為我

官兵兩次擊敗棄其游牧流離奔散皆爾等自取
罪戾不識去逆效順之所致今朕降旨撤兵特因
時屆隆冬官兵連年効力行間令其暫回休息至
於阿逆罪惡滿盈斷難久稽顯戮明歲仍派大兵
前來索取爾哈薩克人等因此么脅逃虜坐致滅
亡朕心不忍從前噶爾丹策零時爾部落尚畏其
強盛力不能支今準噶爾全部歸順天朝供我臂
指復由內地調集大兵前往爾等自審情形將何

恃而不恐朕為天下共主一視同仁雖爾部僻處
荒遠不惜申命告誡是以復降旨申諭並命將軍
大臣等將俘獲爾部人等施恩釋放爾等接奉朕
旨即將阿逆擒獻遣使前來朕必曲加寬宥尚當
格外施恩俾爾等永享承平之福爾等其熟計利
害毋貽後悔

命原任布政使德舒雁平道富尼漢前往巴里坤協
辦糧餉事務

丁卯

命查拏西路坐臺潛逃之喀爾喀等

上諭軍機大臣曰前據兆惠奏稱伊勒巴爾和碩等處坐臺喀爾喀等七名私自潛逃已降旨嚴行查拏今復據稱喀爾喀巴雅爾圖等四人潛謀逃竄經筆帖式德明拏獲就近解送巴里坤辦事大臣查究並將各處坐臺喀爾喀等俱行撤回送至巴里坤等語此等喀爾喀派往西路坐臺竟敢潛行

逃竄必是青滾雜卜遣人前往煽誘不可不嚴行
查究著傳諭雅爾哈善等即將解到巴雅爾圖等
四名審出實情正法示衆其餘撤回之喀爾喀等
暫行看守如在彼尚屬安靜俟軍務竣後仍遣回
各游牧倘敢滋事亦即正法其伊勒巴爾和碩坐
臺潛逃人七名著傳諭達爾黨阿等撤兵回時沿
途嚴加搜查並著阿蘭泰於各卡倫地方加意緝
訪如遇此等逃人即行擒拏解交成衮扎布辦理

戊辰

命定西將軍達爾黨阿來京

上諭軍機大臣曰達爾黨阿哈達哈等撤兵回至北路軍營哈達哈已降旨留在軍營在叅贊大臣上行走會同成袞扎布辦理事務達爾黨阿著即來京其領兵大臣內已命阿里袞富德等先行回京其餘人員有應留軍營差委及遣回京師者交與成袞扎布分別酌量奏聞請旨

辛未

諭定邊右副將軍兆惠防範厄魯特人等

上諭軍機大臣曰現在撤兵暫且停止擒拏阿逆所有厄魯特各游牧人等不能保無與阿逆同謀潛通消息之事從前降旨令將伊等游牧向內遷移而駐劄大兵於各游牧之外著密諭兆惠遵照查辦並留心防範各游牧人等倘有私自逸出與阿逆往來者即行查拏務宜慎密

癸酉

諭駐劄巴里坤辦事大臣雅爾哈善等安插厄魯特人等事宜

上諭軍機大臣曰兆惠等奏稱厄魯特人等生計甚艱所有前赴巴里坤人等請酌給口糧養贍俟明春給與籽種令赴廩集額卜齊布拉克等處及巴里坤淖爾附近地方種地秋收後仍令各回游牧等語此事甚與目前情事相協前曾降旨令將此

項人等諭令各回本游牧因伊犁地方平定如概
留養贍於巴里坤則伊等原游牧轉成棄地殊為
可惜今看伊等情形經阿逆蹂躪之後謀生無策
若量給口糧令其回至游牧則所給之項不過暫
延數日依然窮困甚至流為盜竊俱未可定著傳
諭雅爾哈善等即將近日前赴巴里坤之三都克
所屬人等及向後仍有似此前來者俱照兆惠所
奏暫留巴里坤酌給口糧仍令伊等照達什達瓦

人衆各自謀生俟明春賞給籽種種地秋收後再令回至原游牧不必拘泥前旨辦理

恩賞貝勒品級車木楚克扎布牲隻價值

上諭軍機大臣曰成衮扎布等奏稱貝勒品級車木楚克扎布前聞臺站擾亂即帶兵接續復自伊游牧解送駝五十隻馬六百匹羊一千隻赴軍營交納等語車木楚克扎布屢在軍前効力已加恩封授貝勒品級賞戴三眼翎此次交納駝馬羊隻甚

屬可嘉著加恩於軍需項內將此項牲隻折價賞給

諭定邊左副將軍成袞扎布審訊附賊台吉班珠爾等

上諭軍機大臣曰成袞扎布等奏稱博特巴達什烏巴什等管理牧放馬匹商同協理台吉班珠爾欲將馬匹帶往青滾雜卜處經章京巴顏岱德勒格爾等奪回即帶馬匹赴烏里雅蘇台等語章京巴

顏岱等甚屬可嘉著成衮扎布查明似此奮勉人員奏聞加恩班珠爾及博特巴達什烏巴什等情甚可惡著即嚴行審訊究出首惡正法示衆

議定西路新設臺站章程

定邊右副將軍兆惠等疏奏西路新設臺站章程一摺得

旨軍機大臣議奏尋議據兆惠奏稱每臺應派察哈爾兵十名傳遞事務厄魯特人五十名管理馬

匹牲隻綠旗兵五名種地每十臺派綠旗官一員總領管理臺站及種地事務五臺派筆帖式一員總領每臺派委署筆帖式一員登記檔案現在大兵撤回牲隻數目應行裁減每臺設馬四十匹駝五隻兵丁每年給錢糧八個月每月二兩茶葉四個月每月一包其種地收穫糧石即給為口糧所有厄魯特供應口糧之處永行停止至駝驛官兵馬不得過五匹駝不得過一

隻跟隨臺兵不得過二名違者叅奏凡馳送事件部限六百里緊要事件專行遞送其尋常事件俱交管臺人員於馳送六百里事件之便一併遞送各等語查現奉

諭旨交兆惠雅爾哈善永貴等詳籌臺站事宜毋庸專派厄魯特等承辦以示體卹並令第魯巴前往會同辦理兆惠所奏各事宜俱屬妥協應請交與巴里坤辦事大臣及永貴第魯巴等俱照

此辦理至噶爾藏多爾濟扎那噶爾布及額林
哈畢爾噶一帶各台吉等曾經供應臺站人等
牲隻口糧遵

旨賞給伊等緞疋以示鼓勵一併交與兆惠查明賞
給奏入

上從之

平定準噶爾方略正編卷三十二

欽定四庫全書

平定準噶爾方略正編卷三十三

乾隆二十一年冬十月乙亥

命傳

諭綽羅斯汗噶爾藏多爾濟等

上諭噶爾藏多爾濟沙克都爾曼濟巴雅爾等曰爾等自上年前赴熱河行在入覲後即回至各游牧地方已踰一載甚勞遠念爾等遵朕諭旨約束所

屬守分安居深堪嘉予今屆歲終特遣侍衛第瑪
部員巴哈達等前往存問並齎所賜食物荷包以
示優眷俱各祇受現在阿逆尚在哈薩克苟延殘
喘朕念官兵効力經年時屆寒冬暫行撤回俟明
年領兵再往第阿逆狡詐百出倘遣人潛赴爾等
游牧詭計煽惑爾等即行擒獻毋令脫逃至沙克
都爾曼濟遣人奏稱請於巴里坤附近地方游牧
已諭知雅爾哈善等酌給口糧暫為安插俟明春

賞給籽種赴度集額卜齊布拉克等處耕種秋收
後再行回至原游牧爾等仍善自謀生永享昇平
之福朕有厚望焉

定議派兵駐劄巴里坤

大學士管陝甘總督黃廷桂奏請派滿洲兵二
千名駐防瓜州地方一摺得

旨黃廷桂奏請派滿洲兵二千名駐劄瓜州現在巴
里坤已設庫倫其從前派往兵丁一千名應行更

替著即於派駐瓜州滿洲兵內先派一千名令往
巴里坤駐防其瓜州駐防兵一千名著照黃廷桂
所奏俟戊寅年再行派往所有此次揀選派兵事
宜著軍機大臣議奏尋議派兵駐劄巴里坤應設
協領二員佐領八員防禦八員驍騎校八員筆
帖式一員俱由八旗應陞人員內揀選引

見派往其所派兵丁由八旗前鋒護軍披甲人內挑
選年力強壯者於明年二月內起程其沿途折

給車輛口糧草乾銀兩悉照從前西安兵丁移
駐涼州莊浪之例支給再查此項官兵攜眷前
往應給與治裝立產之資臣等酌議協領佐領
各給整裝銀四十兩立產銀六十兩防禦驍騎
校筆帖式各給整裝銀三十兩立產銀五十兩
兵丁給整裝銀二十兩立產銀三十兩整裝銀
兩在京給發其立產銀兩俟抵巴里坤支給再
查巴里坤現有駐兵房屋應行添蓋補修即著

黃廷桂派員查明鳩工料理奏入

上從之

諭陝甘總督黃廷桂等籌議遣派厄魯特等駐劄瓜

州

上諭軍機大臣曰巴里坤駐劄滿洲兵一千名已經
軍機大臣等議奏派往其瓜州議設駐防兵丁既
經黃廷桂奏請俟戊寅年移駐為期尚遠該處遠
在邊外滿洲兵丁攜眷前往殊屬未便現在厄魯

特等前赴巴里坤者甚多伊犁等處尚有散處厄魯特人等若擇其年壯可任耕種者或一千名或數百名移住瓜州伊等既獲養贍之資加以訓練更可收日後効力之用似無庸更派滿洲兵丁前往著傳諭黃廷桂兆惠雅爾哈善等商酌辦理

大學士管陝甘總督黃廷桂疏奏募民墾種瓜州地畝

黃廷桂奏言查瓜州回人遷移魯克察克所遺

地畝委員逐細丈量共計成熟地二萬四百五十畝應就近招民承種借給籽種照例於收成後扣除其糧石仍按官四民六徵收存貯廳倉以備供支駐防兵丁口糧奏入報

聞

丙子

定邊右副將軍兆惠等疏奏遣使曉諭回部情形

兆惠等奏言前遣往葉爾羌喀什噶爾侍衛提
奇圖章京敦多克塔克慎藍翎愛新泰副前鋒
校瑚圖禮等回至軍營據提奇圖稟稱前奉將
軍策楞令同瑚圖禮前往葉爾羌曉諭波羅泥
都霍集占兄弟等派定一人入

覲並令其速定貢賦章程及派人赴軍前貿易事宜
見霍集占時將文書給與霍集占並未遵行但
稱已遣人同侍衛托倫泰前往一切事宜俱經

具奏隨將我遣回又將帶往厄魯特人等留住
在彼霍集占曾帶兵三千與布魯特交戰兩次
大敗等語據敦多克稟稱前奉將軍策楞遣往
葉爾羌齎送

諭旨令霍集占遣人仍赴伊犁種地霍集占亦未遵
行等語據塔克慎稟稱前奉副都統職銜阿敏
道遣送將軍策楞文書至回部令波羅泥都等
擒拏阿逆使人達什孟庫至阿克蘇地方為阿

布塞塔爾看守今始放回等語據瑚圖禮稟稱
我在阿克蘇聞波羅泥都向霍集占云我兄弟
自祖父三世俱被準噶爾囚禁荷蒙

天恩釋放仍為回部頭目受恩深重爾若有負

天朝任爾自為我必不能聽從各等語臣等看塔奇

圖等所稟回部情形波羅泥都似屬恭順霍集

占素不安分前曾黨同阿逆後畏懼大兵又襲

擊阿逆以圖掩飾其人反覆無常今為布魯特

擊敗始將屢次使人遣回此時不立定貢賦章
程又並未遣人前來顯有背逆情狀臣即飭知
阿敏道令與宰桑巴桑等公同商議作速進兵
綏靖阿克蘇庫車地方令霍集占親來謁見其
伊犁種地回人即照舊派撥前來倘稍抗拒即
行勦滅奏入

上諭軍機大臣曰兆惠等據遣往回部侍衛所告波
羅泥都霍集占等各情形即飭知阿敏道迅速進

兵相機辨理甚合機宜第現在霍集占遣使沙呢
雅斯來京奏稱感激朕恩情甚誠篤霍集占雖未
可深信然其遣使遠來明有畏懼天朝之意此時
如已將霍集占拏獲或伊自行投至伊犁兆惠善
為安撫仍派員解送來京若阿敏道駐兵在彼未
即擒獲兆惠亦遣人至彼將伊遣使前來奉旨准
其投誠之處明白曉諭但令其將每年貢賦照數
交納毋庸加以兵威辦理方為妥協其令回人前

赴伊犁種地一節前已降旨停止著兆惠遵照辦理此次自葉爾羌回來之侍衛提奇圖目擊彼處情形著即馳驛來京以備詢問

丁丑

命授舒赫德副都統馳驛來京

上諭軍機大臣曰舒赫德帶兵追緝烏梁海郭勒卓輝等至銕格爾伯勒齊爾地方知郭勒卓輝逃入俄羅斯即將彼此不容留逃人之例明白曉諭俄

羅斯頭目並領兵向彼索取所辦尚合機宜已令該部移咨俄羅斯薩納特衙門索取郭勒卓輝等舒赫德毋庸領兵前往著將所領兵丁交與哈達哈等帶領此旨到日即行馳驛來京仍加恩補授正紅旗漢軍副都統伊子舒常並著加恩補授三等侍衛

戊寅

諭定邊右副將軍兆惠等擒拏巴雅爾

上諭軍機大臣曰兆惠等奏稱據綽羅斯汗噶爾藏多爾濟等咨稱巴雅爾搶掠洪霍爾拜扎哈沁等五百餘戶殺傷人衆劫奪牲隻已遣和起會同噶爾藏多爾濟等設計擒拏巴雅爾等語巴雅爾原係不可深信之人今果肆行吞噬情甚可惡應即行擒拏治罪第扎哈沁人等牲隻亦甚無多今達報稱駝馬牛羊數至逾萬其中或尚有捏飾之處亦不可不詳加體察再鄂爾奇木濟係扎哈沁宰

桑伊等既被搶掠應由鄂爾奇木濟轉報將軍辦理乃由噶爾藏多爾濟等咨報軍營亦屬非是噶爾藏多爾濟係綽羅斯汗若將附近各鄂拓克事務俱歸管轄亦非所宜嗣後無論何鄂拓克事務俱令徑報將軍方為妥協從前曾密諭兆惠防範巴雅爾稍有可疑即行辦理且因巴雅爾與哈薩克錫喇係同母異父之子是以勿令知覺其時哈薩克錫喇尚係新降未經受朕厚恩今伊効力軍

營甚知感激奮勉且現在尚未抵伊犁兆惠等將
巴雅爾擒拏後俟哈薩克錫喇到時仍如從前一
同辦理事務不必稍露形跡使伊疑懼

定邊右副將軍兆惠等疏奏招服回部情形

兆惠等奏言據副都統職銜阿敏道報稱閏九
月初五日帶兵將至庫車城探知阿克蘇城之
阿布塞塔爾率衆一千人住穆舒爾河霍集占
率衆約三四十人住圖爾滿因向扎爾呼齊宰

桑巴桑等商議云看此情形甚屬可疑遂遣滿洲察哈爾索倫兵三十餘名并派厄魯特兵一半前行即帶餘兵續進離城三十里巴桑遇回人百餘迎敵當即擊殺四十餘名隨令厄魯特兵圍城有回衆千餘迎敵為我兵衝殺退回堅守不出因令驍騎校薩轄等入城曉諭

天朝特來安撫爾等何故出城迎戰據呼岱巴爾氏達爾罕伯克遣人同來託詞支飾又促其辨納

貢賦據云我等久已歸順但厄魯特向係仇敵恐
為所害斷不敢輕出等語因向巴桑商議再遣
人示以厄魯特斷不生事爾等既生疑懼即可
撤回若再支飾即便攻城據呼岱巴爾氏云若
果將厄魯特兵撤回我等即便出城再厄魯特
掠我牛羊米石雖已作為行糧其馬駝懇仍給
還等語因將厄魯特兵退回游牧親帶官兵百
餘名駐劄庫車城辦理招服回部據巴桑等謂

兵力單弱似屬危險我向伊等云惟期於

國家大事有濟豈可論其危險并令將馬駝給還
巴桑等云我等風俗搶掠之物向不給還今既
以大事為重即遵示退給等語初九日厄魯特
等各回游牧俟駐劄庫車城後再將辦理回部
事宜報知臣等即咨覆阿敏道云前發厄魯特
兵原恐回人反覆無常相機勸撫今既顯有抗
拒形跡仍往返說降更復聽信撤兵辦理殊未

妥協即如前次所遣招服之人為霍集占久留
後始遣歸今以孤軍駐劄何裨於事況庫車一
小城耳縱使降服其餘各回城未必一呼即應
且回人即真畏厄魯特或令暫退數程相機行
止乃盡行遣歸游牧恐中緩兵之計今業已撤
回所有辦理回部各城貢賦之例及遣往伊犁
種地回人何時可到并令霍集占於何時至軍
營投見續為呈報臣等伏思回人狡詐性成兼

霍集占素不安分近因為布魯特所敗始遣歸
我使今阿敏道兵力單弱恐難成功臣等擬俟
圖什墨勒扎爾呼齊宰桑等到日酌看回部情
形如果恭順自當撫納倘仍藉端支飾明歲即
應整兵俟其田禾成熟時前往辦理奏入

上諭軍機大臣曰兆惠奏阿敏道帶兵前赴庫車等
處招服回人因回人見所領厄魯特兵丁不敢出
城迎降隨將厄魯特等退回阿敏道親赴庫車城

辦理招降事宜等語回人等向懼厄魯特戕害是
以未敢前來迎降亦或事之所有昨已傳諭兆惠
現在霍集占遣使來京意甚誠篤果能遵諭貢賦
即不必加以兵威且時屆隆冬阿敏道所領厄魯
特兵丁既已退回此時霍集占如已親身謁見將
軍或遣人前赴軍營立定貢賦章程兆惠等即遵
照前旨辦理

已卯

命分賞巴雅爾所屬人等

上諭軍機大臣曰兆惠派和起會同噶爾藏多爾濟等擒拏巴雅爾此時應已辦竣擒拏巴雅爾後伊部落所屬人等應行分賞第噶爾藏多爾濟等雖同派兵擒拏至於分賞戶口不必過多酌量以百戶為率其餘若鄂爾奇木濟等酌量分賞令其管轄餘俱歸入二十一昂吉方為妥協再輝特部落內如和通額默根等雖與巴雅爾同一部落伊等

俱屬安靜所屬戶口自不得照巴雅爾一例辦理
并將巴雅爾戶口歸入伊等管轄亦可著傳諭兆
惠遵照辦理

辛巳

命獎賞軍前効力喀爾喀王公等

上諭軍機大臣曰哈達哈等將軍前奮勉之喀爾喀
郡王策布登扎布等開列具奏已命軍機大臣等
酌量伊等勞績分別獎賞策布登扎布巴扎爾什

第俱著賞戴三眼翎恭格敦丹著賞戴雙眼翎向
例親王不令戴翎以示優異其領兵及隨圍時並
著戴翎今親王成袞扎布現辦副將軍事務亦著
戴三眼翎如來京遇大典禮時仍照在京親王體
制

命獎賞軍營効力人員奇徹布等

上諭軍機大臣曰舒布圖鎧巴圖魯頭等侍衛奇徹
布著在乾清門行走索倫副總管鄂木布著補授

索倫總管伊等此次効力軍前甚屬奮勉並著交
部議叙賞給世職其索倫官員內卓里雅扎爾善
薩壘諾穆察等四員亦屬奮勉俱著賞戴孔雀翎
以示獎勵

壬午

命喀爾喀親王巴扎爾什第查辦游牧匪竊人等
上諭軍機大臣曰前因喀爾喀內有劫奪商人匪賊
降旨令郡王德木楚克回至游牧查辦今西路大

兵已撤親王巴扎爾什第亦即回至軍營並著伊
速赴游牧會同瑚圖靈阿等辦理再據貝勒顏楚
卜多爾濟奏稱伊游牧地方所有齊木齊格特人
等肆出為匪請暫移至阿壩垓地方居住等語朕
已允其所請齊木齊格特人等著即嚴行查拏正
法以昭炯戒

甲申

諭定邊右副將軍兆惠籌辦進兵哈薩克事宜

上諭軍機大臣曰前因時屆寒冬降旨暫行撤兵俟
一二年後相機辦理今據瑚什來京奏稱阿逆與
阿布賚等雖俱遠遁彼處不能過冬偵探大兵已
撤必仍赴原游牧居住等語果爾伊等往返奔馳
人馬俱已疲困正可乘機進剿俾賊人不得少為
休息途窮計蹙自將阿逆擒獻若為日既久賊困
稍舒不若此時更易為力昨已傳諭兆惠酌量派
兵赴阿布賚游牧地方襲擊並飭知各鄂拓克人

等防範阿逆前來侵擾兆惠等自能遵照辦理現在兆惠所駐地方與哈薩克相近著預選索倫兵一千名以備來春進剿之用彼處現有巴里坤解送馬一千匹即於附近地方加意牧放俟擒拏巴雅爾後選其馬匹駝隻以益兵力兆惠等務宜悉心籌畫如有未協機宜之處即行據實奏聞若應如此辦理亦毋庸兆惠領兵朕自派員馳驛前往兆惠現在辦理一應事宜俱甚妥協著賞給佩用

荷包鼻煙壺以示優眷近因舒赫德追擒烏梁海
郭勒卓輝等甚屬奮勉已加恩補授副都統令其
來京詢問彼處情形俟到京後即令其前赴軍營
更替兆惠來京面詢一切事宜並傳諭兆惠知之

乙酉

諭駐劄巴里坤辦事大臣雅爾哈善等解送軍營馬
匹

上諭軍機大臣曰昨已傳諭兆惠揀選兵丁於明年

春間進兵哈薩克擒勦阿逆軍行馬匹關係緊要
著傳諭雅爾哈善等所有應解軍營馬一千匹即
行解往仍令黃廷桂豫備馬匹解赴巴里坤交雅
爾哈善轉解

戊子

叅贊大臣舒明疏奏拏獲青滾雜卜賊黨伯爾
格等

舒明奏言前經副將軍成袞扎布遣察哈爾營

總炳圖喀爾喀護衛齊納圖前往烏梁海地方
途中拏獲青滾雜卜遣往烏梁海之伯爾格等
三人臣等訊問伯爾格等供稱青滾雜卜遣伊
等赴公丹拜貝子彭楚克烏梁海達爾罕巴顏
及新烏梁海赤倫察達克莽噶拉克等處調兵
八百名伊等俱不聽調遣等語彭楚克達爾罕
巴顏等並將伊等拏獲交與炳圖等解送前來
隨委員解赴成衮扎布軍營訊問奏入

上諭軍機大臣曰舒明奏拏獲青滾雜卜遣往烏梁
海之伯爾格等現在解送成衮扎布軍營著嚴加
刑訊即行正法新舊烏梁海等並無一人附和青
滾雜卜聽其調遣大兵一到送賊自可即日擒獲
成滾扎布即速領兵前往勿少遲疑炳圖齊納圖
及朋楚克達爾罕巴顏等擒獲逆黨俱屬奮勉著
加恩賞給孔雀翎以示鼓勵

庚寅

大學士管陝甘總督黃廷桂疏奏設立巴里坤
軍營理事同知事宜

黃廷桂奏言查巴里坤地最緊要現在兵民雜
處明年又派撥滿洲兵丁駐劄請設立理事同
知一員專管旗民事務照各省邊缺例三年俸
滿送部引

見以應陞之缺照例陞遷並請於通省人員內揀選
題補奏入

上從之

辛卯

密諭駐劄巴里坤辦事大臣雅爾哈善等拏解巴雅爾

上諭軍機大臣曰據雅爾哈善等奏稱巴雅爾遣伊
護衛德爾登報稱沙克都爾曼濟屬人搶掠伊等
所屬馬匹牲隻又伊克商人等亦有將伊屬人戕
殺之事因其所報情形未確令其詳查再行辦理

等語雅爾哈善等所辦甚是已雅爾搶掠扎哈沁
游牧經噶爾藏多爾濟等報知副將軍兆惠已派
和起前往擒拏此時和起等如已將巴雅爾拏送
巴里坤軍營即委員押解來京倘尚未拏獲而巴
雅爾自知其罪希圖巧為掩飾或親至巴里坤申
訴伊屬人被刦之事著雅爾哈善等明白曉諭伊
等皆係受恩封汗之人部內互相戕害事關重大
必須來京面為陳奏自蒙鑒察伊如聽從即委員

解送來京或推托不行亦即將伊拏解前來毋令
兔脫

癸巳

諭定邊左副將軍成袞扎布停遣喀爾喀兵丁

上諭軍機大臣曰成袞扎布奏稱大兵往擒青滾雜

卜暫令駐劄呼雅克圖地方俟調遣喀爾喀兵丁

到日即行前進等語現在逆賊情形毋庸多調兵

丁往勦且哈達哈等大兵撤回不日可以會合其

喀爾喀兵丁著停止調遣第將伊等馬匹解赴軍營以供大兵乘騎方為合宜再烏梁海等既未經遣兵助賊且深感朕恩願派兵二千名豫備調遣宰桑哈克圖圖布慎等甚屬可嘉著賞給緞匹以示鼓勵所有烏梁海兵丁亦毋庸調遣俱令在各游牧加意防守逆賊青滾雜卜屢次遣人煽惑烏梁海俟拏獲後並將屢次遣往之人一併擒拏治罪

命革巴蘭泰副都統職銜

上諭軍機大臣曰前令巴蘭泰赴策凌等游牧傳諭
自應輕騎速往乃攜帶多人自為擁護實屬怯懦
著革去副都統職銜加恩授為理藩院郎中以觀
後効前命策凌等派兵勦滅烏梁海今烏梁海已
經辦竣即著巴蘭泰傳諭策凌等毋庸派兵前往
十一月乙未

定邊左副將軍成袞扎布疏奏遣多爾濟策登

回游牧事宜

成袞扎布等奏言據哈達哈咨稱現在擒拏青
滾雜卜先遣多爾濟策登馳驛前赴軍營其可
否遣回游牧之處聽臣等酌議臣等查多爾濟
策登之弟及妻子所屬人等現與逆賊同居一
處并有訛言多爾濟策登已經正法者今聞
皇上格外施恩仍封公爵其所屬人等自必倍加感
激應令伊速回游牧曉示利害如能擒獻逆賊

奏請加恩倘敢黨同青滾雜卜仍俟進兵時一併拏解治罪奏入報

聞

丙申

命獎賞軍前効力之順庫爾察克等

上諭軍機大臣曰哈達哈等奏稱達瓦藏布宰桑班珠爾屬人順庫爾察克厄魯特台吉吹喇錫屬人賽音察克賓巴等進兵哈薩克時派為嚮導行走

奮勉等語順庫爾察克等俱著賞給銀兩并其妻子等送往察哈爾居住

庚子

定邊右副將軍兆惠等疏奏拏解策楞等赴京日期

兆惠等奏言十月十六日據定西將軍達爾黨阿派員解策楞抵臣軍營臣隨派護軍校伊三泰等於十七日起程由巴里坤赴京再副都統

哈寧阿現在領兵將抵軍營玉保與哈寧阿同行俟其到日亦即拏解赴京其副將軍扎拉豐阿亦於十月十六日抵臣軍營臣即傳

旨授為公爵於十九日令其起程赴京奏入報

聞

辛丑

副都統唐喀祿疏奏赴科卜多辦理情形

唐喀祿奏言臣遵

旨於十月二十日赴科卜多承辦軍務查所存滿洲
察哈爾巴爾虎綠旗兵丁共一百八名馬七百
餘匹駝六百餘隻米三百餘石羊一千四百餘
隻臣現在妥協豫備俟郡王策布登扎布叅贊
大臣哈達哈等領兵經過將牲隻口糧照數支
給至科卜多地近卡倫所餘兵丁一百餘名不
敷差遣請於撤回及臺站兵丁內酌量存留二
百名奏入報

聞

壬寅

叅贊大臣哈達哈等疏奏領兵協擒青滾雜卜情形

哈達哈等奏言臣奉

命隨同副將軍成袞扎布擒拏青滾雜卜今撤兵至額爾齊斯地方復經成袞扎布調策布登扎布至克木克木齊克地方會同舒明堵截逆賊臣

隨派索倫喀爾喀兵七百名交策布登扎布前
往餘兵五百名臣即帶領赴將軍成衮扎布處
聽候調遣再次撤回喀爾喀王公扎薩克內
派貝勒那木扎爾車蘇隆公策登薩木丕勒同
副都統扎爾杭阿鄂博什管轄後隊兵丁前來
其親王巴扎爾什第貝勒沙克都爾扎卜貝子
達爾扎三達克多爾濟公恭格敦丹三都卜多
爾濟扎薩克根敦等俱請同往擒賊以圖報効

臣現帶領同行奏入報

聞

恩賞達什達瓦屬人口糧

上諭軍機大臣曰達什達瓦所屬人等自巴里坤移

駐鄂爾昆時屆天寒生計不免稍窘著加恩賞給

口糧三個月以示體卹現據富森奏請派章京筆

帖式等協同照看達什達瓦屬人游牧事務著派

筆帖式一員領催一名馳驛前往

癸卯

諭和碩特汗沙克都爾曼濟嚴禁屬人搶奪事宜

上諭軍機大臣曰據雅爾哈善等奏稱沙克都爾曼濟拏解偷竊馬匹厄魯特特穆爾得默爾等至巴里坤請旨即行正法等語厄魯特等搶奪成風不可不嚴加懲創特穆爾得默爾等即照所請正法並著傳諭沙克都爾曼濟伊拏獲所屬竊盜人等原可自行辦理今解送巴里坤請旨辦理甚屬恭

順伊屬人衆多必須嚴行禁止嗣後如有此等搶奪為匪之人聽伊自行查辦毋庸解送巴里坤

命遣厄魯特都爾圖等赴瓜州駐防

駐劄巴里坤辦事大臣雅爾哈善等奏言十月
初十日鄂什喜卡倫送到厄魯特都爾圖等三
十二戶一百二十五人詢知係達什達瓦屬人
二十日送到厄魯特畢克等四十二戶一百五
十人詢知係達瓦齊屬人現俱遵

旨暫留巴里坤酌給口糧過冬俟明年春間再行遣

往奏入

上諭軍機大臣曰前經降旨令雅爾哈善派厄魯特
兵一千名駐防瓜州此次厄魯特都爾圖畢克等
著暫留巴里坤俟明年春間派入駐防瓜州兵內
遣往

丙午

諭副都統濟福等查辦車臣汗部落匪竊賊人事宜

上諭軍機大臣曰據濟福等奏稱查辦車臣汗部落
匪竊賊人因瑪尼巴達喇現在患病未及會辦其
齊木齊格特人等亦暫行慰諭緩籌辦理等語瑪
尼巴達喇尚屬年幼不諳事務今既患病毋庸會
同辦理伊部落內屬人滋事皆因德木楚克久在
軍營未獲經理所致今已撤兵回至游牧著濟福
等會同德木楚克妥協查辦至齊木齊格特游牧
地方與呼倫貝爾鄰近著密諭伊桂豫備兵丁聽

候調遣俟擒獲青滾雜卜後伊柱即領兵將齊木齊格特人等辦理此時毋得洩漏

丁未

諭定邊左副將軍成衮扎布等籌議防範阿逆事宜
上諭軍機大臣曰阿逆奸狡性成現在尚未擒獲所
有一切緊要卡倫俱應設兵豫備近據順德訥奏
稱阿布賚將伊女與阿逆為妻並查出伊部落內
所獲厄魯特人等交與管轄等語是阿逆當此計

窮力竭猶復煽惑哈薩克斷不肯安靜無事必須預為防範使逆賊無所逞其奸宄成衮扎布既深悉喀爾喀烏梁海情形哈達哈又經深入哈薩克一切地方形勢自應瞭然或應於額爾齊斯等處派兵二三千名防守或更有緊要地方設卡防範偶有騷動以逸待勞方為妥協如應先遣兵丁乘其不備奮力擒勦亦即相機辦理著成衮扎布哈達哈會同軍營大臣等悉心籌畫以副委任

諭定邊左副將軍成衮扎布等安插新降人等

上諭軍機大臣曰據成衮扎布等奏稱新來歸降明
噶特特楞古特綽羅斯等共四百戶酌量賞給口
糧即令前往原游牧再輝特台吉噶爾丹達爾扎
屬人前已給過口糧兩個月其續到戶口請一併
給與口糧等語此等新降之人前曾令其各回原
處地方昨經兆惠奏請暫行安插是以復降旨雅
爾哈善等今將新赴巴里坤人等暫給口糧過冬

俟明年再為籌辦今此項明噶特特楞古特綽羅斯等應一體辦理著即賞給口糧令於現在所住地方過冬其明歲如何遣回并令何人兼管之處會同哈達哈等詳議具奏但特楞古特奇爾吉斯人等若係古爾班和卓屬人即不應加恩俱著照阿逆屬人之例賞給喀爾喀等為奴並著哈達哈查明辦理再嗣後有似此投誠人等其在十戶以內者送至察哈爾安插三十戶以內留烏里雅蘇

台等處給予口糧令其當差若至三十戶以上人數衆多酌量在科卜多布延圖等處居住接濟口糧仍遣回各原游牧成衮扎布等即遵照分別辦理至噶爾丹達爾扎人等前次雖俱經賞給口糧現在未能充裕著將新到戶口及從前已經賞給口糧人等一體加恩再給口糧兩個月以示體卹命調撥馬匹赴巴里坤軍營

上諭軍機大臣曰現在巴里坤馬匹雖已敷用但尚

須多為預備且伊犁或尚有需用馬匹之處前降
旨方觀承購馬五千匹今已收槽餵養著將直隸
購買馬匹解往西安西安馬匹調往甘肅甘肅馬
匹調往巴里坤逐次更換調撥可免長途疲瘦之
虞而巴里坤得此馬匹尤覺應用裕如現又據黃
廷桂奏稱接四川總督開泰咨稱川省可撥馬一
千匹解甘備用等語並著傳諭開泰即於川省營
驛馬內揀選一千匹就近委員解交黃廷桂驗收

以備來春調遣

命移扎木叅游牧於哲爾格西喇呼魯蘇地方

上諭軍機大臣曰據哈達哈等奏扎木叅懇將伊屬人等移住卡倫內游牧等語即照所請准其在哲爾格西喇呼魯蘇游牧扎哈沁人等既與喀爾喀連界居住著即令其在附近卡倫照喀爾喀等設卡防守則伊等既得効力差委支領錢糧以資養贍其喀爾喀兵丁亦可量行裁減著成衮扎布等

妥協辦理

定邊左副將軍成衮扎布等疏奏台吉諾爾布等請移游牧地方

成衮扎布等奏言據二等台吉諾爾布呈稱我同貝勒策登扎卜由游牧布延圖布拉克遷至布克隨地方策登扎卜為青滾雜卜擒獲復遣協理台吉班珠爾向游牧人衆煽誘叛逃我等受

國恩不肯附從今同協理台吉固穆扎卜阿喇卜坦
二等台吉拉旺三等台吉布精旺兌楚魯木等
各率屬衆俱遷至博羅哈卜齊爾地方俟厄魯
特達什達瓦人等遷移之後請往察罕扎輝等
處居住并請以所帶馬駝供應呼濟爾圖阿魯
托卜蔡各臺站等語臣等即照所請辦理俟擒
獲青滾雜卜後奏請加

恩奏入報

聞

平定準噶爾方略正編卷三十三

欽定四庫全書

平定準噶爾方略正編卷三十四

乾隆二十一年冬十一月戊申

諭定邊右副將軍兆惠曉諭衆厄魯特等防守游牧

事宜

上諭軍機大臣曰據兆惠奏接到派兵防範哈薩克之旨隨傳哈薩克錫喇尼瑪吞圖布等派兵二千名前赴軍營會議防守等語此奏辦理未協前降

旨令兆惠將應否作何防範及今歲應否進兵哈薩拉克等處悉心籌畫如有未協機宜之處即據實奏聞原未指定即於今歲進兵即發兵前往現在兆惠所領索倫兵丁儘可調遣若哈薩克錫喇等經年効力軍營甫回游牧豈可即行調遣使之僕僕道路伊等能不缺望且兆惠現奏今歲不及進兵而但以會商事務竟行傳至軍營更屬未合著即傳諭停止但令哈薩克錫喇等在各游牧地

方加意防守倘遇賊來侵犯即將游牧內移使賊
不獲搶掠徒費往返以疲其力一面再派兵掩襲
始合機宜兆惠即遵照辦理

已酉

申諭定邊右副將軍兆惠等防範哈薩克事宜

上諭軍機大臣曰昨日兆惠等調遣厄魯特兵丁防
守未合機宜已降旨詳悉訓示從前達瓦齊據伊
犁時厄魯特等各游牧俱在博羅塔拉地方與哈

薩克毗連是以哈薩克人等得以肆行搶掠今各游牧俱移至博羅塔拉以南則彼處地方皆成閒曠現在阿布賚及阿逆等屢經擊敗逃竄他往大兵撤回後不過回至伊舊時游牧哈薩拉克等處必無力繞道前來滋擾第防範不可不周惟宜設卡巡防以備不虞至我大兵往勦即緩至明春前進未始不可此時厄魯特各游牧正應令其安居休息以逸待勞未可屢議調遣也再伊等奏稱道

都托羅垓巴顏阿瑞二處俱屬緊要著每處派兵
五百名交哈寧阿三格帶領防禦此外尚有應行
防守地方並著兆惠等悉心籌辦

搶掠臺站賊人綽克圖等分別治罪

喀爾喀公蘇巴什里等查拏搶奪臺站賊人綽
克圖等請

旨分別治罪交理藩院核擬具奏得

旨綽克圖等二十人著即處斬梟示其從行二次之

馬甲多爾濟著即處斬所有為從之達爾馬等三百二十三人并多爾濟扎卜等二十人俱應照所奏擬絞第念伊等皆係蒙古無知之人誤聽隨行且所搶馬匹俱如數交出著加恩寬免至圖謝圖汗雅木丕勒多爾濟等不能約束屬人本應議處但既將賊人查獲牲隻亦如數追繳加恩概予寬免

庚戌

諭定邊左副將軍成袞扎布移駐軍營各事宜

上諭軍機大臣曰北路科卜多等處現在駐劄大臣辦事將軍軍營應移駐烏里雅蘇台以便居中調度著傳諭成袞扎布俟擒青滾雜卜後即攜帶眷屬前赴烏里雅蘇台駐劄現在阿逆與阿布賚交結明春必應發兵擒拏第念喀爾喀人等連年効力軍營不免勞頓俱著回至各游牧休息明歲毋庸調遣惟由西路派兵辦理並著成袞扎布哈達

哈等曉諭喀爾喀王公等知之

諭陝甘總督黃廷桂進兵擒拏阿逆事宜

上諭軍機大臣曰黃廷桂所奏調解西安馬匹摺內有行文甘涼各處俟其到時沿途分撥則皆知為補缺之馬不致啓人疑議等語此亦何疑議之有豈黃廷桂尚未深悉此事機宜耶阿逆之負恩逃竄罪在必誅以國法論之固不得不極力擒追用示顯戮以事理論之尤不得不深籌勦獲永絕根

株前此降旨撤兵不過暫令休息俟一二年後再
為相機酌辦其實一切進剿事宜仍當及時籌備
若竟任其遠颺必致終貽後患況準噶爾一事實
皇祖

皇考未竟之緒仰承

上蒼默佑適值事有可乘今伊犁等二十一昂吉皆隸
版圖豈可留此遺孽撓我已成之功致貽將來之
患阿逆從前尚不過了身遠颺雖意其必將煽惑

哈薩克以圖狂逞而勢難驟合不妨徐為之圖今
據順德訥所奏則阿布賚已妻之以女假之以衆
黨羽盤結其必不能忘情於伊犁已可概見且以
阿逆之窮凶極惡反覆狡詐將來亦安知不吞噬
阿布賚而悉奪其衆迺致滋蔓難圖是叛賊一日
不獲則伊犁一日不安邊陲之事一日不靖大臣
以體國為心俱應籌辦及此至用兵之費雍正年
間西北兩路費至五六十萬今自用兵以來統計

軍需纔及一千七百餘萬即更有多費而剪此凶
頑永救荒服朕亦何惜今所慮者不過馬不足用
甘肅一省屢經調撥缺額自多現今直隸購買馬
五千匹已降旨全數解往將來即再有需用之處
自當預為籌畫正不必以此鰓鰓過計也朕非舍
逸好勞務勤遠略良以揆機度勢斷無中止之理
既已事在必行自當明切宣諭俾衆共曉然於一
勞永逸之意所有辦理軍需事宜屆期另當降旨

黃廷桂令其來京面諭著將此先行傳諭知之

辛亥

恩擢軍營効力索倫總管畢里袞等

上諭軍機大臣曰據達爾黨阿等奏索倫總管畢里袞等隨營効力甚著勞績等語總管畢里袞協領由屯俱著賞給副都統職銜二等待衛瑪瑞著授為頭等待衛佐領布喇勒圖俟有總管缺出即行補授三等待衛濟塞布阿克蘇著授為二等待衛

拜唐阿額爾登額海蘭泰前鋒翹蘇勒俱著授為
藍翎侍衛千總永安著補授守備五品叅領錫喇
卜納旺俱著賞給四品職銜管旗章京密瑪克頭
等侍衛巴圖濟爾噶爾俱著授為散秩大臣吏部
筆帖式額倫特著授為本部主事其革職効力贖
罪之前鋒章京伊三泰著加恩仍授為健銳營前
鋒章京

命議處定西將軍達爾黨阿等

上諭軍機大臣曰達爾黨阿等遣哈薩克楚魯克昭
華什等向阿布賚曉諭而留阿喇勒拜杭吉勒圖
於軍營為質乃並不加意防守致阿喇勒拜等先
後逃脫續經拏獲杭吉勒圖又不即行正法仍復
疏縱辦理實屬玩愒達爾黨阿及軍營叅贊大臣
等俱著交部嚴加議處

命拏解運糧遲悞遊擊堆齊來京治罪

上諭軍機大臣曰遊擊堆齊係解送口糧牲隻之員

沿途遲至數月傷損牲畜甚多且遇見達爾黨阿
遣往迎接之人輒將口糧等項給與伊即回至巴
里坤實屬玩悞著即拏解來京治罪

壬子

命留哈薩克撤回兵丁於巴里坤

上諭軍機大臣曰據兆惠等奏哈薩克撤回兵丁除
留伊犁外餘兵七百名已令回至巴里坤等語著
傳諭雅爾哈善此項兵丁到日即將喀爾喀兵丁

遣回游牧其索倫察哈爾等兵丁留在巴里坤酌
量賞給口糧聽候調遣

乙卯

申諭定邊左副將軍成袞扎布速擒青滾雜卜事宜
上諭軍機大臣曰成袞扎布等奏稱遣往曉諭青滾
雜卜侍衛巴圖孟克及曉諭旺布多爾濟之羅卜
藏阿扎喇等回至軍營告稱和托輝特人等皆知
青滾雜卜負恩叛逆並不附從青滾雜卜現帶兵

前往托濟烏梁海等語成袞扎布派員先往曉諭
辦理甚合機宜著賞給荷包鼻煙壺以示優眷侍
衛巴圖孟克著有勤勞著賞給副都統職銜并銀
一百兩羅卜藏阿扎喇等俱著賞戴孔雀翎和托
輝特人等既知大義不附逆賊青滾雜卜隨從不
過四五十人此時或已被旺布多爾濟擒獲亦未
可定著即行進兵勦捕並曉諭烏梁海等協同擒
獻逆賊即可指日就俘至所奏圖布懼赤倫明噶

特特楞古特所屬人等至克木齊克偷竊牲畜請
旨各遣回游牧等語此時阿逆尚未就擒伊犁地
方亦多匪竊若遽將此等人遣回勢必互相搶奪
殊屬未便計其人數無多或分給喀爾喀等為奴
或陸續解至察喀爾安插著成衮扎布酌量辦理
丙辰

命派兵擒拏巴雅爾等

上諭軍機大臣曰昨據雅爾哈善等奏布庫努特得

木齊多爾濟等告稱哈薩克錫喇尼瑪等負恩謀
叛現在領兵搶掠巴里坤並擒拏噶爾藏多爾濟
等語朕尚疑為未確降旨諭雅爾哈善李繩武等
帶兵訪查會同兆惠相機辦理適又據和起遣人
告知巴雅爾哈薩克錫喇尼瑪莽噶里克等同謀
為逆情由事已屬實厄魯特等似此辜恩背叛必
應盡行勦滅雅爾哈善等毋庸領兵前進第宜安
輯巴里坤地方毋令衆心搖惑並派兵加意防守

著傳諭哈達哈即由北路軍營馳驛來京面聆訓
示再往辦理哈達哈所領索倫兵丁現留烏里雅
蘇台著博爾莽察前往帶領由阿濟必濟一帶速
赴巴里坤聽候調遣軍行應需馬匹著黃廷桂速
行解往雅爾哈善等應即選精兵二三百名馳赴
兆惠處告知現在情形並令兆惠即率所部兵丁
回至巴里坤沿途遇背叛賊人悉行勦滅倘哈薩
克錫喇尼瑪等並未與巴雅爾同謀或旋行改悔

自陳罪狀雅爾哈善等即善為慰諭派委妥員解
送來京再沙克都爾曼濟等現在巴里坤居住其
情形如何亦應詳加體察如無別情即派伊等同
往勦賊倘稍有可疑亦當乘其不備先行勦滅雅
爾哈善等務宜詳慎辦理

諭定邊左副將軍成袞扎布詳察達什達瓦屬人情
形

上諭軍機大臣曰額林哈畢爾噶等處厄魯特等同

謀叛逆已派兵辦理著傳諭成衮扎布等現在達什達瓦屬人等住居鄂爾昆地方如果安靜無事毋庸辦理倘稍有可疑即著成衮扎布發兵前往勦滅其子女等俱賞給喀爾喀等為奴成衮扎布務宜詳慎辦理

命侍郎裘曰修馳赴西路軍營辦理事務
諭陝甘總督黃廷桂派兵駐防巴里坤

上諭軍機大臣曰巴雅爾等現在背叛巴里坤地處

邊要宜派兵前往駐劄前令派安西綠旗兵一千名交傅魁帶領前往著再派一千名令馬得勝即隨後起程如兵尚不足黃廷桂仍豫為派定以供臨期調遣所有現在辦理機宜已命裘曰修馳赴肅州面為宣諭黃廷桂即遵照辦理

丁巳

命授博爾奔察為內大臣

上諭軍機大臣曰博爾奔察帶領索倫兵前往巴里

坤聽候調遣著加恩授為內大臣同侍衛順德訥
馳驛前往

諭喀喇沁貝子瑚圖靈阿等查辦齊木齊格特人等
事務

上諭軍機大臣曰據瑚圖靈阿等奏會同俄羅斯畢
爾噶底爾雅古畢等定議邊界事務業經辦竣其
俄羅斯奈瑪爾等入巴爾虎等界內偷盜馬匹一
事應俟俄羅斯撤納特衙門查辦等語瑚圖靈阿

等守候伊等撒納特衙門查辦盜賊為日尚久毋庸在彼久待即著曉諭伊等撒納特衙門查辦明白後行文理藩院再行辦理瑚圖靈阿多爾濟即會同濟福查辦齊木齊格特人等事務至俄羅斯奈瑪爾等越境偷竊前降旨伊柱領呼倫貝爾兵丁五百名駐劄卡倫聽候調遣即著伊柱加意稽查並著傳諭黑龍江將軍綽爾多派兵巡防嚴緝匪竊人等治罪毋得任其脫逃

命調陳弘謀為西安巡撫派甘肅巡撫吳達善赴巴

里坤承辦軍需事務

命調吉林察哈爾等處兵丁赴巴里坤

上諭軍機大臣曰西路現需兵丁調遣著傳諭吉林

將軍額爾登選派兵丁一千名交滿福帶領來京

並著察哈爾總管等選兵一千名交端濟布敏珠

爾多爾濟等帶領來京分起馳赴巴里坤聽候調

遣

命侍衛圖倫楚達禮善馳驛前往巴里坤聽候調遣

戊午

命傳

諭扎薩克公額敏和卓防守事宜

大學士管陝甘總督黃廷桂奏言據扎薩克公額敏和卓呈稱奉將軍和起檄調兵丁四百名於十一月初一日由魯克察克起程隨同將軍行走初六日莽噶里克尼瑪等率兵搶掠將軍

和起被圍莽噶里克向衆厄魯特言額敏和卓
原係回人暫令回至魯克察克莽噶里克隨遣
人令其赴吐魯番額敏和卓不甘從賊託病未
往等語又據哈密副將祖雲龍稟稱貝子玉素
富接額敏和卓來信知莽噶里克背叛情形莽
噶里克之子白和卓現在內地適於是日由京
抵哈密未便遽令回巢現在拘留防守等語奏

入

上諭軍機大臣曰據額敏和卓具報莽噶里克背叛情形甚屬可惡著傳諭雅爾哈善等即選派妥員前往曉諭額敏和卓伊係輸誠最久之人感激厚恩遣人報信朕甚嘉予伊身在賊中實深軫念現在甫從瓜州遷至彼處諸務未經整理豈有擒拏逆賊之力如能誘擒莽噶里克固屬甚善俟奏凱後其地方悉交伊管轄倘力有不能惟將駐劄地方嚴加防範靜候內地大兵前往即可戡定現已

調集各路兵丁剋期前赴著額敏和卓遵照辦理
至祖雲龍將白和卓羈留防守甚合機宜著傳諭
黃廷桂遇有總兵缺出即行請旨補授

命阿拉善貝子羅卜藏多爾濟領兵前赴巴里坤

上諭軍機大臣曰前派兵擒拏青滾雜卜降旨令羅

卜藏多爾濟豫備兵丁聽候調遣嗣因北路兵丁

已足敷用傳旨停止今西路尚需派兵仍著傳諭

羅卜藏多爾濟於所轄兵丁內選派五百名馳赴

巴里坤其沿途應給車馬口糧著黃廷桂等妥協
豫備

恩卹台吉額林沁多爾濟等

上諭軍機大臣曰據哈達哈等奏台吉額林沁多爾
濟旺辰多爾濟等進兵時出痘身故等語額林沁
多爾濟等効力行間遽爾溘逝甚屬可憫額林沁
多爾濟乃額駙策凌之子著格外加恩授伊子那
蘇圖多爾濟公品級承襲頭等台吉仍賞銀二百

兩旺辰多爾濟無子著施恩賞給伊家銀二百兩

庚申

申諭中外用兵事宜

上諭大學士曰前據兆惠奏綽羅斯汗噶爾藏多爾濟報稱扎哈沁游牧牲畜駝馬為巴雅爾搶掠隨令和起帶兵一百名及回人莽噶里克額敏和卓兩路兵丁并檄調厄魯特兵前往擒拏續據雅爾哈善奏和起兵駐闕展時尼瑪等所帶布魯古特

都爾伯特扎哈沁兵丁約一千五百餘名竟至操
戈相向而莽噶里克之兵亦遂從後鼓譟以致和
起僅率親隨百餘人徒步轉戰身帶重傷觀此則
是伊犁地方又生一事端矣貪殘好亂反覆狡詐
固屬準夷常性然亦由阿逆未經擒獲之故昨降
旨黃廷桂所謂叛賊一日不獲則伊犁一日不安
邊陲之事一日不靖者正為此耳現在巴里坤地
方已經添駐重兵以資彈壓并派調索倫察哈爾

吉林等兵迅速前往協力擒捕其二十一昂吉中
如有為其煽惑妄思蠢動者則移兵進剿以安反
側而靖荒服夫準噶爾夷衆本非勁旅前歲平定
伊犁時偏師直入業已所向披靡今該地又經阿
逆蹂躪之後凋敝已極大兵所至自可計日戡定
尚屬易於經理之事特外間無識之人又不免妄
生議論必謂此事原不當辦即經辦矣仍復生變
何如不辦之為愈殊不思準噶爾之為西北邊患

自有明迄今垂四百餘年我

皇祖

皇考當鳴爾丹噶爾丹策零等藩籬完固兵力強盛之時尚且屢申撻伐以為邊陲久安之計朕仰承

鴻緒上荷

天庥適值該夷部落攜離人心渙散之後既已機有可乘而乃安坐失之豈不貽笑於天下後世亦何以
上對

皇祖

皇考在天之靈耶此所以熟籌審計實有萬不得已之苦心非一時之好大喜功開邊釁而勤遠略也若謂此事本不當辦則當策凌等先後款關時即應拒而不納然伊等窮蹙來歸而竟絕之境外在策凌策凌烏巴什等庸懦之人尚不過失意而去竊笑無能至阿逆之兇暴殘忍既已無所歸依必至搶劫滋事其擾害於我喀爾喀諸部又不知作何

景象矣其究亦必至於用兵則與其用兵於投誠之人何如因勢乘便俾得返其游牧而各安生計乎至阿逆之負恩逃竄則又伊之自外生成非可逆料不得歸咎於從前辦理之非也然朕辦理始意亦惟欲按其四部分封四汗衆建而分其勢俾之各自為守以奉中國號令聊示羈縻而已乃伊等蠢愚無知不能承受太平之福以致自干勦戮實非朕之本懷豈此中實有

天意故非人力所能與耶況該夷地近西陲雖定以疆
界准通貿易而犬羊之性久之亦難保其不生釁
端今即重煩兵力得以永靖邊圉揆之事機尚應
斷然為之豈有已成之功轉為棄置之理至於用
兵之費雍正年間西北兩路費至五六千萬今自
軍興以來統計軍需纔及一千七百餘萬將來即
更有多費較之曩時終屬減省亦何惜焉朕於此
事並非舍逸而好勞實由於事勢之不可已況人

君日理萬幾國計民瘼實深乾惕宵衣旰食自是分內事亦不專因軍書旁午而始時厯憂勤也和起効命疆場捐軀報國忠節可嘉深為憫惻著照傳清拉布敦之例加恩贈卹並將此通行曉諭知之

命獎賞大學士管陝甘總督黃廷桂等

黃廷桂奏言回人莽噶里克與厄魯特等潛謀叛逆經臣雅爾哈善等將莽噶里克之子白和

卓嚴拏拘禁臣查哈密與吐魯番毗連現在厄魯特及回人等貿易貨物在巴里坤哈密往來出入者甚多恐有潛通信息之事應派兵嚴加防守哈密雖有防兵二千名然安設臺站看守卡倫及分撥差使坐守倉庫其存城者不過一二百人巴里坤兵丁亦僅一千餘名各項差委之外存城亦屬無幾即密扎安西提督傅魁選兵一千名以五百名添駐哈密五百名添駐巴

里坤但兵數尚少若再向內地甘涼肅各營徵調必至張皇查有派赴巴里坤種地官兵五百名及塔勒納沁種地兵二百名原議明年二月起程亦令於此時先行起程前往防守更覺有益再晉省解到駝隻出關未久若趕赴軍營又須撥兵防護已截留安西一帶牧放餵養續調馬匹未至軍營者現咨商雅爾哈善等於附近哈密和暖地方截留餵養將來一有需用即可

調往而此時不即趕赴軍營亦可省撥兵防護之煩至馬駝尚須豫為籌辦奉

旨解馬五千匹內安西馬一千匹已於十一月初旬先後起程計此時已抵軍營陝甘兩省滿漢各營馬尚有四五萬匹實可揀選三萬匹已數次檄飭加緊飼餵並不時差員查看務期腴壯適用但陝省各營與肅州相距遙遠按站行走即需五六十日長途趕送易致疲乏請將陝省滿

漢營馬先行調解來甘令其陸續行走至甘省
後分撥涼甘肅各營交州縣官加意餽養至陝
省摘缺之數應聽自行領價購買如此則辦理
從容而馬匹亦可收實用奏入

上諭大學士曰黃廷桂經理軍務籌畫精詳一切調
度甚合機宜大臣能如此明決擔承實心體國深
可嘉悅著賞給雙眼孔雀翎並加賞騎都尉世職
令伊子承襲雅爾哈善吳達善等宣力軍營實心

辦事雅爾哈善著賞給內大臣職銜吳達善著賞給孔雀翎以示獎勵

諭辦解軍營駝馬事宜

上諭軍機大臣曰黃廷桂奏稱陝甘滿漢各營約可調馬三萬匹檄飭加緊餵養以備調用等語現在派調察哈爾吉林及索倫兵丁約計四千名備馬二萬匹即可敷兵丁乘騎之用著即照數挑撥分起陸續解赴巴里坤約於明春二月內到齊不致

遲悞至駝隻一項前令方觀承購買一千隻又豫
備行營駝一千隻解交明德轉送陝省解往巴里
坤並著傳諭明德再購駝千餘隻解往備用

辛酉

諭籌辦軍營糧餉事宜

上諭軍機大臣曰現在派調各路兵丁明春進勦口
糧最關緊要前黃廷桂籌辦軍需曾請撥餉四五
百萬彼時以軍務將次告竣未經准行今雖不必

如此多備然亦須酌量足敷四五千兵之用恐甘肅一省不能猝辦著將安西糧石撥運巴里坤應用再將山西歸化城糧石撥運安西以備接濟河南麥麵於軍需食用亦為有益并著多為運送其應如何酌定數目迅速辦運之處著各該督撫詳細咨商妥協辦理

十二月乙丑

諭稽查臺站事宜

上諭軍機大臣曰蘇巴什里等奏各處臺站請交附近臺站各扎薩克台吉等管理其總管臺站事務人員每年於春冬二季巡查兩次以核功過等語應如所請辦理伊等每年巡查後著於年冬彙奏其有應行加恩及議處各扎薩克台吉等候朕分別酌量以昭懲勸

丙寅

諭安插輝特郡王策登多爾濟屬人事宜

上諭軍機大臣曰策登多爾濟奏請賞給口糧以資接濟等語伊等現從喀爾喀遷往若賞給口糧未免難於馱運且伊等舊遊牧地方現在滋事不能安居著傳諭阿蘭泰即令伊等赴烏蘭古木等處給與耕種地畝俟明年收成後再行遷徙其所需籽種照達什達瓦屬人之例交明德運往二百石仍令阿蘭泰加意安撫

丁卯

諭都爾伯特汗策凌等防範哈薩克事宜

上諭軍機大臣曰哈薩克阿布賚等雖被大兵兩次
擊敗潛踪逃竄今大兵既撤自必仍回巢穴或乘
間侵擾都爾伯特策凌等游牧均未可定前已降
旨令策凌等加意防範或乘其不備先發兵前往
襲擊使賊不得寧處倘遇阿逆遣人前來煽誘及
偵探各處情形即著策凌等拏解來京毋令脫逃
至策凌等奏請派員經理伊等游牧事務伊等約

求屬人甚屬妥協毋庸再行派往現在烏里雅蘇
台及科布多等處駐劄大臣辦事離伊等游牧不
遠如有緊要事務即遣人往駐劄大臣處妥協商
辦其陳奏事件亦即交與轉奏

戊辰

命獎賞西路管理臺站人員等

上諭軍機大臣曰自巴里坤至京臺站遞送文報皆
能迅速無悞該管員弁及臺站兵夫等俱屬黽勉

著該督撫查明請旨分別議叙賞賚以示鼓勵

己巳

申諭策楞玉保等擒賊不力罪狀

上諭大學士曰據雅爾哈善等奏稱策楞玉保由西路軍營解途間遇厄魯特賊衆被害等語從前令將策楞玉保解解來京特以伊等身係將軍叅贊大臣專任擒拏逆賊乃各懷私意並不勇往向前即如達永阿自阿逆處脫出即向玉保言阿逆

相距僅隔一日程途趨行即可追及玉保理應速
行前往乃並不追擒祇令達永阿轉告策楞以卸
其責維時策楞與玉保相距亦僅隔一程而策楞
又置若罔聞託言無馬徑回伊犁試思兵丁馬匹
即使難得策楞豈亦無乘騎之馬且使果無馬匹
又何以將哈薩克錫喇遣往而伊等又何以返至
伊犁耶其意蓋以不能追及逆賊罪尚可諉若追
及而不能擒獲則罪滋大是以如此故為推卸任

其遠賜其心尚可問乎如伊等彼時以去賊不遠
奮勇直前即使不獲成擒朕亦必為曲諒乃已得
逆賊實信反心存觀望坐失事機致令逆賊免脫
罪實萬無可追前降旨將伊等拏解來京蓋欲審
明情節通行曉諭明正其罪今策楞玉保俱於途
次遇賊被害在二人身獲重罪固無足惜然使將
伊等解京審明情節既可以顯彰國憲亦可使共
見朕心今伊等惡孽滿盈致干天譴死於亂賊假

使伊等不如此推諉受朕何等重恩或奮勇追捕
逆賊雖未成擒而身歿戰陣朕亦必加以優卹同
為一死視今日之為賊所害者輕重何如耶此皆
不以國事為重挾私悞公為天所惡之所致也著
將此通行曉諭至同時被害解送策楞玉保之官
員兵丁雖與陣亡者有間然因公差遣遇賊身亡
殊屬可憫著查明交該部將如何恩卹之處議奏
命解莽噶里克屬人色梯巴勒氏至肅州監禁

上諭軍機大臣曰雅爾哈善等奏拏獲莽噶里克遣
至哈密回人色梯巴勒氏等請旨即行正法等語
色梯巴勒氏等係莽噶里克所遣之人聲言搶掠
哈密巴里坤搖惑衆聽甚屬可惡應照所奏辦理
第在彼處正法莽噶里克聞知易生疑懼著解至
肅州交黃廷桂嚴行監禁

辛未

命獎賞哲卜尊丹巴胡土克圖

欽定四庫全書

平定漳陽軍方略正
卷三十四

三八

上諭軍機大臣曰據成衮扎布奏稱逆賊青滾雖卜
逃往齊斯吉特地方已派納穆扎爾領兵追擒不
日即可就縛等語成衮扎布辦理勇往俟擒獲逆
賊時加恩優叙至哲卜尊丹巴胡土克圖於青滾
雜卜煽惑衆喀爾喀時即齊集各部落王公等申
明大義曉示利害俾不為逆賊所惑深堪嘉予著
晉加敷教安衆喇嘛名號賞給緞疋派侍衛黑達
色齋往以示獎勵其策登扎卜策布登等與賊同

謀應一併治罪著於擒拏青滾雜卜後俱解送來
京候朕降旨

兩好

諭旨 命白都訥副都統愛隆阿帶兵赴西路軍營

諭旨

諭旨

大臣曰白都訥副都統愛隆阿奏請前往

軍營效力

著照所請會同滿福帶領吉林兵丁前

往巴里坤聽候調遣

平定準噶爾方略正編卷三十四